

Հ Ա Շ Վ Ե Տ Վ ՈՒ Թ Յ ՈՒ Ն

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆ 2018 ԹՎԱԿԱՆԻ ԳՈՐԾՈՒՆԵՈՒԹՅԱՆ ԿՐԹՈՒԹՅԱՆ ՈԼՈՐՏԻ ՄԻՋՈՑԱՌՈՒՄՆԵՐԻ ԾՐԱԳՐԻ ԵՎ ԳԵՐԱԿԱ ԽՆԴԻՐՆԵՐԻ ԻՐԱԿԱՆԱՑՄԱՆ ԱՐԴՅՈՒՆՔՆԵՐԻ ՄԱՍԻՆ

(սեղմագիր՝ զանգվածային լրատվական միջոցներին տրամադրելու համար)

ՀՀ կրթության և գիտության նախարարության գործունեությունն ուղղված է եղել կրթության որակի և մատչելիության բարելավմանը՝ համակարգի բովանդակային և մեթոդների արդիականացման, իրավական դաշտի ամրապնդման ու կառավարման արդյունավետության բարձրացման ճանապարհով:

Կրթության ոլորտի զարգացման հետագա ուղղությունները նախանշելու նպատակով, ՀՀ կառավարություն է ներկայացվել «Հայաստանի Հանրապետության կրթության զարգացման մինչև 2030 թվականի պետական ծրագիրը հաստատելու մասին» ՀՀ օրենքի նախագիծը, քննարկումների արդյունքում որոշվել է կատարել փոփոխություն «Կրթության մասին» ՀՀ օրենքում, որի արդյունքում ծրագիրը կընդունվի ՀՀ կառավարության որոշման տեսքով:

Մշակվել և ՀՀ կառավարությանն է ներկայացվել «Պարտադիր ուսուցումից դուրս մնացած երեխաների բացահայտման և ուղղորդման կարգը հաստատելու մասին», «Նոր սերնդի դասագրքերի և ուսումնասօժանակ գրականության ստեղծման չափանիշներին և գործիքակազմին հավանություն տալու մասին» որոշման նախագիծը: Իրավական ակտերի նախագծերի վերջնական ընդունման համար անհրաժեշտ են համապատասխան օրենքներում կատարել լրացումներ, որից հետո դրանք կհաստատվեն ՀՀ կրթության և գիտության նախարարի հրամանով՝ հիմք ընդունելով ՀՀ Սահմանադրության 6-րդ հոդվածի պահանջները:

Մշակվել և ՀՀ կառավարությանն է ներկայացվել «Նախադպրոցական կրթության այլընտրանքային, ծախսարդյունավետ մոդելների ներդրման ծրագրին հավանություն տալու մասին», ՀՀ կառավարության որոշման նախագիծը:

«Կրթության բարելավում» վարկային ծրագրի շրջանակներում 2018 թվականին հիմնվել է 17 նախակրթարան՝ շուրջ 425 երեխայի ընդգրկմամբ, այդ թվում՝ Վայոց Ձորում՝ 3, Լոռիում՝ 4, Գեղարքունիքում՝ 1, Երևանում՝ 9 նախակրթարան:

Ընդլայնվել է համընդհանուր ներառական կրթության համակարգը՝ ընդգրկելով նաև ՀՀ Արմավիրի մարզը, հանրակրթական դպրոցներում ներդրվել է ուսուցչի օգնականի հաստիք, կիրառվել է կրթության առանձնահատուկ պայմանների կարիք ունեցող երեխաների համար սահմանված ֆինանսավորման բարձրացված չափաքանակի սանդղակը՝ ըստ երեխայի կարիքի ծանրության աստիճանի:

Ընդլայնվել է «Կայուն դպրոցական սնունդ» ազգային ծրագիրը՝ 2018 թվականին ծրագրում ներառվել է ՀՀ Շիրակի մարզը: 2018 թվականի սեպտեմբերի 1-ից ՀՀ Շիրակի մարզի հանրակրթական դպրոցների նախակրթարանների, 1-4-րդ դասարանների և ներառական կրթության համակարգում ընդգրկված շուրջ 13000 սովորողներ ստանում են անվճար սնունդ: Շարունակվել է ծրագրի

իրականացումը մինչ այդ մեկնարկած՝ Սյունիքի, Վայոց Ձորի, Արարատի և Տավուշի մարզերում: Միաժամանակ շարունակվել է ՄԱԿ-ի Պարենի համաշխարհային ծրագրի կողմից իրականացվող դպրոցական սննդի ծրագիրը, որում Լոռու, Արագածոտնի, Կոտայքի, Գեղարքունիքի, Արմավիրի մարզերում ընդգրկված է շուրջ 60 հազար սովորող:

Հանրակրթական ուսումնական հաստատություններում մեկնարկել են «Քո արվեստը դպրոցում», «Դաս Ա նախագծերը» և Դպրոցական աբոնեմենտային ծրագիրը, որում ընդգրկվել են հանրապետության բոլոր դպրոցները:

Վերապատրաստվել է շուրջ 7000 ուսուցիչ, ատեստավորման արդյունքում առաջին աստիճանի տարակարգ է շնորհվել շուրջ 393 ուսուցչի, իսկ 2-րդ աստիճանի տարակարգ՝ շուրջ 18 ուսուցչի:

ՀՀ կառավարություն են ներկայացվել «Հայաստանի Հանրապետության կառավարության 2006 թվականի օգոստոսի 24-ի N 1262-Ն որոշման մեջ փոփոխություններ կատարելու մասին» ՀՀ կառավարության որոշման նախագիծը:

Հաստատվել է «Հայաստանի Հանրապետության հանրակրթական հիմնական ծրագրեր իրականացնող պետական ուսումնական հաստատության դասարանների կազմավորման կարգը հաստատելու մասին» ՀՀ կառավարության որոշումը:

ՀՀ ԿԳ նախարարի հրամանով հաստատվել է Հայաստանի Հանրապետության նախնական մասնագիտական (արհեստագործական) և միջին մասնագիտական կրթության ոլորտում սոցիալական գործընկերության հայեցակարգը և պատրաստվել դրանից բխող օրենսդրական փաթեթ, որը շուտով շրջանառության մեջ կդրվի:

Բարձրագույն կրթության և գիտահետազոտական գործունեության ոլորտների արդյունավետության բարձրացման, այդ ոլորտների արդիականացման ու միասնական օրենսդրական դաշտի կարգավորման անհրաժեշտությամբ պայմանավորված՝ վերանայվել և լրամշակվել է «Բարձրագույն կրթության մասին» ՀՀ օրենքի նախագիծը՝ նախաձեռնելով «Բարձրագույն կրթության և գիտահետազոտական գործունեության մասին» նոր՝ միասնական օրինագծի մշակում:

Շարունակվում է իրականացվել սոցիալապես անապահով , ինչպես նաև սահմանամերձ կամ բարձրլեռնային բնակավայրերի ուսանողներին ընտանիքների ուսանողների ուսման վարձավճարների փոխհատուցում՝ 50-100%-ի չափով: Առկա ուսուցմամբ, բակալավրի կրթական աստիճանում բարձրագույն ուսումնական հաստատություններում սովորող երկու և ավելի երեխա ունեցող ուսանողների համար նախատեսվել է ուսման վարձի լրիվ փոխհատուցում: Բակալավրիատում և մագիստրատուրայում սովորող, մարտական հերթապահություն իրականացնող զորամասերում մարտական հերթապահության մեջ ընդգրկված պարտադիր ժամկետային զինվորական ծառայություն անցած ուսանողներին պահուստային միջոցներից հատկացվել է ևս 20 % գեղջ: